

太上洞玄靈寶梓潼本願真經

國史館藏

凡欲誦經先當潔滌身心次使壇場嚴整然後焚香設供展誦瞻禮

上聖駕臨必獲萬福敬之戒之

祝香神呪

爐焚道德香徹透九天內真靈願降臨綵雲結華蓋願此香雲中

帝君遊三昧寶臺現蓮華共與說無礙稽首朝帝君願消一切罪

禮請偈

願入文昌嗣祿會各發無上至誠心信禮道
經師三寶信禮十方諸僊聖信禮七曲衆真
靈惟願垂慈來降格

禮訖默獻自意隨心啓叩然後平坐持呪
誦經信受奉行

淨三業神呪

身中諸內境三萬六千神動作履行藏前劫
并後業願我身自在常住三寶中當於劫壞

時我身常不滅誦此真文時身心口業皆清
淨急急如律令

淨壇神呪

太上說法時金鐘響玉音百穢藏九地羣魔
護騫林天花散法雨法鼓震迷沉諸天賡善
哉金童撫瑤琴願傾八霞光照依皈依心早
發大法稿翼侍五雲深急急如律令

安萬靈呪

元始安鎮普告萬靈獄清真官土地祇靈左

社右稷不得妄驚回向正道內外澄清各安
方位備守帝庭太上有命揆捕邪精護法神
王保衛誦經皈依

大道元亨利貞急急如律令

玄蘊呪

玄元始炁分清化開洞神靈風迴太和玉音
攝流精至哉本自然誰識此幽文堅剛明一
悟倏忽超三乘寂寂天色根永劫莫漂沉胡
能精修持爾身得長生

聰明神呪

九天大帝身披白衣日月照耀乾坤幹隨有
能敬者聰明如斯黃老丹元與心合宜五神
衛守八聖護持誦之不輟萬神赴機我司大
化光耀生輝心之弗塞祛鈍除迷誦之萬遍
文冶瓊瑰詞源浩浩筆陣風馳九天開化萬
章洞微元皇上帝勿稽勿違急急如

元皇上帝律令

念帝君聖號

金闕上相簡較太師混元內輔玉清上宰大都
督府都統三界陰兵行便宜事管天地水三界
獄事收五嶽四瀆真形虎符龍券總諸天星曜
判桂祿二司上僊元皇真人司祿職貢舉真君
洞照通真先生編修飛僊列籍掌混元造化輪
迴六道救苦救難慈尊玉清內境清淨道真身
現紫微崑手持如意杖統御萬靈普濟諸苦大
仁大孝大聖大慈無上不驕樂天帝九天定元
保生扶教開化主宰長樂永佑英顯靈應大天

帝君掌五湖四海總十二河源水府運判定慧
證果王菩薩迦釋梵鎮如來澄真澄觀注祿定
籍寶光慈應治世顯道保安拔罪更生永命扶
善濟苦消劫行化天尊

念畢澄心默坐叩齒九通吸東方炁存想
帝像然後誦經

靈寶消劫正心開化章上品

爾時

元始天尊在清微天宮黃金闕內會諸天帝君
與無極聖衆昇玉華寶座放大光明照諸世界
觀諸衆生遭值劫運受無量苦惱宛轉塵寰輪
迴生死慨爾嘆曰民哉民哉誰使而然哉是時
有一真人名曰慈濟從法座起越班而出長跪
道前白

天尊言賤臣不德仰叨道蔭得離斯苦昨覩

玉皇尊帝簡較圖籙推定劫運勅北陰黑煞多
目原厲及諸天魔王等衆下巡人間興動兵戈
流布瘟疫殺戮生民萬萬億數俾諸世人靡有
遺類今觀衆生父子兄弟夫婦男女肝腦塗地
號泣悲哀莫能相保繼以天災大行鬼現白晝
間獲免彼終莫此逃未審此諸衆生曠劫以來
造作修種何所違戾而獲是報可不悲歎可不
悲歎伏願慈悲示以未悟

天尊告曰此諸衆生自往劫來不敬三寶不孝
父母邪淫貪愛姦詐嫉狠造種種罪惡日熾日
滋是故

玉帝論定劫運更變世人雖可悲痛亦其自取
爾時慈濟真人暨諸聖衆各稽首而白

天尊言臣等卽是思惟心大不忍疾首蹙額力
不能抅惟願天恩發慈悲心開方便路垂一金
臂援其焚溺庶使人道不至類絕臣等敢冒死
謹言於是

天尊撫几高抗澄神默坐良久答曰邈者蜀有

大神號曰梓潼居昊天之位齊太乙之尊位高
南極德被十方掌混元之輪迴司仕流之桂祿
考六籍事收五嶽形歷億千萬劫現九十餘化
念念生民極用其情是以

玉帝授之如意委行飛鸞開化人間顯跡天下
蓋此未劫實未可除若欲消之此神其可吾當
爲汝等召之俾救度末世勿使類絕於是慈濟
真人及諸天聖衆再拜禮謝復位於是

天尊命持幢玉女向不驕樂天下之者三忽

梓潼帝君擁五色雲霞之炁自西北至雍容雅
步再拜而前白

天尊言今日吉慶興此法筵臣貪於行化以至
後會恭望天慈特賜原宥

天尊告曰夫民受天地中生自陰陽內化五行
範體二氣結形而不知人身難得樂土難生乃
貪婪姦詐莫知紀極以至劫運適逢兵戈競起
疫癘流行水火焚漂悉皆繇也今諸

帝君天上地下無極聖衆咸請於我願消此劫

故特以畀汝汝其勉之爾時

梓潼帝君拜謝奉旨欲退

天尊重告曰帝子此諸末劫運數浩大汝今消之何道而可

梓潼帝君復再拜而前白

天尊言臣自劫劫中萬生本身責在蜀地兢兢惶惶懼不稱職方切思過乃誤

天恩臣謹惟消除此劫先正人心爲人子者訓使之孝爲人臣者訓使之忠訓兄弟以友恭訓

夫婦以和順訓居上者使待下以情訓治事者使處心以公率而行之或者可以少彌於是

天尊乃垂盼嚮之容而稱嘆曰奇哉帝子憫念衆生說是因緣心得開悟若諸世人推行不已則可以消除劫難興國太平人享高壽物遂本性五穀豐熟歌謠滿路一或反之則兵戈疫癘頻仍相籍橫尸遍野枯骨成山而人類絕矣子其勉之於是

梓潼帝君拜謝復擁五色雲霞之炁自西北而

退爾時慈濟真人聞是說已歡喜踴躍卽於座中以頌贊曰

堪嗟爾衆生 姦詐復貪嗔 營營日滋熾
擾擾不知懲 致遭末世劫 人類將沉淪
於是元始尊 憫念諸有情 欲拯末劫苦
爰命梓潼君 筆中顯三昧 秩秩先正心
塵迷能導引 福祿終來并
於是慈濟真人說是頌已四衆歡喜異口同聲
嘆未曾有

靈寶消劫正心靈應章中品

道言

元始天尊在玉華座上收斂光明澄神默坐瑤
壁輝映真氣包絡鐘鼓輻輳仁風交暢道意微
密暄然如春一切金僊四衆八部幢幡寶節侍
在側焉爾時元載孔昇天主濟沉拔罪真人東
岱嶽府君各從座起長跪道前白

天尊言臣等往劫何修獲預法會親炙道語心
竊欣感然臣等愚蒙聞是經說心雖歡喜終竟

未達切謂人心不正致罹此劫自非
天尊乘大金臂放大光明展大神通勅諸巡世
神祇各令復位則或者他道似未爲急今大劫
已至運難豐浩而九天開化方正人心臣恐其
緩伏望天慈示以未悟於是

天尊浩然長嘆而告諸真衆曰嗟呼汝等尚未
達理之本耶夫人之生善性根焉孝悌衷焉四
端具焉五行範焉忠信胚焉和遜傳焉所爲人
也非比草木禽獸之爲類凡形肖人似皆一同

之及世道淪降人心不古機巧姦僞貪妬狼亂
種種不善踴躍爲之是以見三寶而不敬對三
光而無禮呵風罵雨怨天尤地待父母如同路
人視兄弟如見仇敵責人常詳處已每怨見人
有善掩之不及則毀之無所不至見人有惡喜
而慕之則效之惟恐弗勝富貴者驕奢淫佚傲
慢賢能褻瀆師長昂首闊步視貧賤如履草芥
不知修種不行陰騭暴殄天物中市網利了不
知止貧賤者諂諛貪嗔怨咎鬼神不知前世因

果不能安分守已邪淫偷盜犯分干禮終莫自
悔是以惡人滿世邪鬼橫行讒慝交進謗讟竝
興政治乖舛人民困苦山川告匱鬼神不寧怨
氣鬱結上薄太空世道至此寧得不變所以簡
較圖籙運合數周推此大劫日月薄蝕陰陽乖
戾魔鬼巡世亂民迭興兵戈疫癘頻仍不已命
苟彼逃終莫此免枯骨成山流血若水殄滅人
類勿使遺種若欲救之豈易爲力吾故命
梓潼君開化九天飛鸞採世俾諸世人洗心滌

慮咸臻善道爲子而能孝其親爲臣而能忠其
君爲兄弟而克友克敬爲夫婦而克和克順居
上待下者必以情臨政處事者必以公不貪不
妬不奸不僞習此不已化成天下則鬼神欽仰
天地寧謐老者可以得壽少者可以得養國土
可以清平五穀可以豐熟末世可以返古豈惟
末劫歟不消乎吾若放光垂臂雖可救之然人
心不正其何能救故不若人心旣正大劫自除
諸巡世神祇方欽仰畏避豈敢肆毒汝等各宜

諦心恭聽勿生他慮於是元載孔昇天主濟沉
拔罪真人東岱嶽府君皆歡喜作禮默然復位
爾時

天尊復告四衆曰我今再剖因緣汝等各宜諦
聽人爲萬物靈心爲一身主沉沉靜靜不愆於
慾不雜以僞無慮無思發而爲言溫和慈讓發
而爲行中正端直其於親不期孝而自孝其於
君不期忠而自忠其於兄弟不期友敬而自友
敬其於夫婦不期和順而自和順不厚責於人

不循物以私率性而行舉皆中道何者容心故
其國清平其人安康其世上古今末世凡人勉
強遵守不違不戾心心不退念念不忘其獲福
亦可如是豈以大劫持此而不消乎於是
天尊而說偈曰

靈哉一點 不擾不驚 無思無慮

至聖至明 天理昭著 善性根成

一雜以僞 五體摧傾 自然歸正

百福來并 敬之慎之 大衆齊聽

於是

天尊說偈已諸天真衆無執神仙嶽瀆神祇歡
喜踴躍嘆未曾有

靈寶消劫正心報應章下品

爾時保和應化真人卽於道前拜首而言曰未
審此經消劫之外有何功德伏望

天慈爲四衆諦釋諸天神仙嶽瀆祇靈天上地
下及未來一切衆生廣說利益於是

天尊告保和應化真人曰善哉若諸國王帝主
宰輔大臣奉持此經推充此道躬行不替教化
天下自然風淳俗厚政善人安五穀豐登萬物
熙遂若諸世人平居無事至心沉慮精加轉誦

自然父母長壽子孫榮貴家道興隆身體康健
凡有所求種種如願若復有人或入山林或入
江海遭遇惡風逢值毒獸但能懺悔存念此經
自然山神衛護河伯維持猛獸自退風浪頓止
若復有人或在軍陣或遇冤家但能懺悔存念
此經自然惡人善解凶惡不逢終不害已安穩
如常若有婦人或臨產厄或求嗣息但能懺悔
存念此經自然安穩平康生福德男女聰明智
慧爲人尊貴若或有人爲諸神廟轉誦此經是

諸鬼神當脫鬼趣轉增天福又有道士至人善
男信女開闢淨室更着新服繪畫

九天主宰真像香火燈果淨水供養滌去凡思
端心正坐持誦此經是其左右一切鬼神等或
有聞者卽離鬼趣登證僊果一切餓鬼等或有
聞者脫饑渴苦受度南宮一切畜生等或有聞
者脫畜生苦復歸人道一切草木等或有聞者
已枯使榮轉更茂盛飛潛動植胎卵濕化一切
有情咸遵道化又此經所在及持是經人當有

十萬飛天上聖救苦真人金剛力士神僊兵馬
金精猛獸無執數衆嘗來擁護一切功德說不
可盡於是保和應化真人稽首白

天尊言此經功德衆咸聞之若諸世人或有疑
惑不信妄生誹謗不擇淨案便將安置不持齋
戒便將轉誦未審此諸罪輩當得何報伏願

天尊再示未悟爾時

天尊言曰噫子今所叩豈不異乎此經功德不
可度量其報應亦不可具述若諸世人敬持遵

奉疑惑誹謗獲福獲罪各有輕重若廣說之凡
流邪見反啓疑貳我今說經止救末劫世人疑
信一聽自然性命禍福豈可戶曉但願世人事
親者當爲心孝母爲面孝事君者當爲心忠母
爲面忠處兄弟則當心友心敬母面爲友敬處
夫婦當心和心順母面爲和順待下者母面似
至情而心實不情臨事者母面示至公而心實
不公若能遵行此道則雖疑惑誹謗猶信也若
不遵守此道則雖齋戒敬誦猶不信也善者積

善惡者積惡積之既久天地鬼神臨之質之禍
之福之皆自然也吾何言哉於是保和應化真
人及諸天僊衆同聲稱贊而說偈曰

大哉渺渺玉星中 推較河源俱此劫

殺戮生民億億衆 頂禮至尊難可說

於是天尊發慈悲 九天開化普俱雪

但教心地常清淨 疑信從教衆生竭

我今稽首悉辭尊 萬萬生靈母誑蔑

爾時保和應化真人暨諸僊衆說是偈已稽首

天顏作禮而退信受奉行

梓潼帝君救劫寶章

真君曰吾一十七世爲士大夫身未嘗虐民酷
吏周人之急濟人之乏容人之過憫人之孤
一心如此聽命于

天若依此行

天必降之福

饒一着 添子孫之福壽

退一步 免隙駒之易過

忍一言 免駟馬之難追

息一怒 養身心之精神

神霄小吏谷雷讚曰

妙哉斯編 誠哉是言

謹守行之 福佑自天

梓潼帝君說救劫章

真君曰吾道德圓通久證真位茲以劫運可念

遂願救度衆生壬申歲七月七日

時西晉懷

帝永嘉六年琅輿羽軒麟車鳳駕金童玉女

神將天兵樂隊旌旗百萬引從侍衛森列樂

音震天蒙

天帝命爲太玄無上上德真君同中書門下平章事上主三十三天仙籍中主人間壽夭禍福死生貴賤下主十八重地獄輪迴拜命訖空中大震七聲天旋地轉吾以劍一指天地停車日月停軸頃刻間紫雲上衝黑氣盤結有二童子以善惡簿進曰寅卯而後劫運可駭承旨預定善惡敢以簿進吾閱善簿得忠孝功德陰隲修行者若干人閱惡簿得十惡

五逆臣民官吏士農工商僧道雜流爲惡若干人吾憫劫運之臨世人造惡無有窮已今遣十惡大魔三百萬飛天神王三百萬神兵神將一千六百萬以五道雷神主之收取惡人又大風大雨大水大火大疫竝作以收惡人用充劫運罪罰不遠深可哀憐吾今爲度脫衆生私露天機畧具善惡簿中曾有功過者以爲世人警戒今勸世人每日侵晨持誦玉皇大天尊玄穹高上帝

尋聲赴感太乙救苦天尊

九天應元雷聲普化天尊

玉虛師相玄天上帝金闕化身蕩魔天尊

消劫行化更生永命天尊五位等聖號朔望誦救劫章并

太上感應篇一遍以消罪愆先當遵以六章修行庶持念聖號靈篇得以感應如此則自然福祿無量子孫榮昌金車入門仕宦卿相若不遵此六章修行徒口誦經欲免罪愆名曰

瀆天其罪尤重愈不可解吾今降下此經流傳於世

七曲帝君亦屢頒降所在以三千神兵衛之其有讀誦此經而不信受與前信受後有悔心者仰飛天大神卽時收取以充劫數如有秘藏此經而不傳者其罪惟均各宜省悟

天下通行警戒章第一

真君曰哀哉今世之人子不孝於親弟不敬於兄下不順於上婦逆於舅姑弟子凌師長士虧實行官恣貪謀農趨末作工競浮華僧道誑俗自毀真教罪罰不遠深可哀憐各宜遵吾警戒勇猛修行以逃劫運

天下通行孝感章第二

真君曰人之立身以孝爲本

東京趙居先父年九十一歲母年九十四歲性皆嚴急居先夫妻侍奉勤謹孝行克諧每夕焚香爲父母祈禱三尸上奏天遣飛天大神逐日鑒察見其心專意一孝行動天七子

三婿皆列殊科居先身證仙果

茂州黎瓊棄父貪淫酒色三年淹母殞經五載被雷火焚之

徽州李氏女名善瑜適葉元贊長子年三十自十八侍奉舅姑極孝家貧已雖饑寒凡飲食不敢嘗啖以奉舅姑舅姑病甚家貧不能召醫自爲祈告天地願以身代舅姑適遇三官巡察空中聞之奏聞

玉帝勅旨加其舅姑壽一紀仍賜錢八十萬注名祿籍二子賜品官後一歲一旦門未啓忽見廳上金玉滿堂變易果得錢八十萬其鄰居秦氏女年二十恃其長舌抵觸舅姑李氏嘗勸之而不聽李氏受錢日秦氏爲雷火焚燒卽善惡之報昭然可畏

天下通行士行章第三

真君曰吾一十七世爲士大夫未嘗虐民酷吏今人衣冠紛紛日讀其書恃其文章而行已法度孝行陰功畧不加意或兄弟分爭或宗

族相毀或夫妻反目或父子憎嫌或倚恃富勢而欺凌小民或矜恃才能而欺侮前輩或口誦佛老而薄於父母或貌敬天地而中萌欺詐或教人公訟而破散人家或巧妄語言而助人之過或破人婚姻或誹謗同類或播人是非或埋藏陰毒此等罪犯難可解雪倘或回心庶幾免咎

衢州范元之素貧盛暑江浴拾得金銀一袋於岸歸謂其子曰世人以財爲命萬一有人

失此自經於溝壑枉喪性命翼旦父子攜於岸待之果見一婦悲號而至元之詰其故曰夫坐獄當死易田得銀至此失之元之卽以還之婦與分亦不肯受旣而鄉里多薄之謂其不能經營生理空自守貧元之笑而不答次年父子登第至今十二世爲二千石瀘川李挺先才高自爲第一以兄弟參商好毀人婚媾發人私密遂降其籍

信州林茂先才高過人以捧鄉書家極貧閉

戶讀書鄰家巨富婦厭其夫不學私慕茂先
才名夜奔之茂先呵之曰男女有別禮法不
容天地鬼神羅列森布何可以此污我婦慙
而退茂先次年登第三子皆登第見聞者各
宜悛戒

天下通行日用章第四

真君曰凡今之人毒惡殘忍巧詐不常難爲指
名姑示一二勸戒

杭州王用先家資百萬置大小二斗大小二
秤較量出入以欺陷人止及十年遭禍被刑
家財破散子孫作丐

福州福清縣文紹祖與柴公行議親旣問名
柴女忽中瘋紹祖欲更之其妻大怒曰我有
兒當使其順天理自然久長悖禮傷義是爲
速禍大斥紹祖卽娶柴女歸次年紹祖子登
第柴女瘋亦痊生三子皆登第

何元益與趙明夫議婚已定而趙女失明家
計寥落元益易其親與單子文爲姻次年父

子俱喪明趙女適士人葉惟先惟先登第三
典大郡

階州孫仲可欺奪寡婦之田繼與通姦中年
盲聾子孫齟齬

建州楊進多廣田園百計吞併交易不明至
少子鍾仲不肖三年破散蕩盡

元秀家財四十萬養子四人其餘諸妾所出
不問男女並瘞埋之一日夢中見十數輩來
追殺人賊元秀大驚起兩手兩足已爲牛蹄

展轉於床大叫三日頭斷而死陰府申聞

天曹

帝大怒曰性根不壞方得人身天神誦章始離
母腹愚人不禁情慾嬰兒有何罪愆揆以正
條倍於故殺殺人償命理所當然天曹牒下
陰府判斷元秀受罪外拘囚地獄在生四子
注籍刑名四十萬財没入官府近者四方奏
牘類此者衆下酆都別置一籍收錄此等名
字差北方飛天神王統領神兵巡行天下有

似此者卽許便宜施行不待事終赴十獄考鞫

真君曰人子不孝自有天條誅戮無罪殺兒是殺天下人民也故元秀身墮地獄四子犯刑家財沒官且人之殺兒何不節慾乃敢殺人
不顧今世如元秀者何地無之吾觀鄴都城中以此受罪者不可勝數各宜省悟不可自取天譴若元秀永囚地獄萬劫受罪子孫受刑可不悲夫禍福無門唯人自招

天下通行官守章第五

真君曰士之居官以忠爲先今世大異上而卿相下而一命賄賂公行公道不立
皇天震怒何況侵民膏血自肥一家阨民噤喉自謀進取不公不法不仁不義決一勝於目前結無窮之冤業劫數來時福力盡處果報昭彰若速悔心猶可免戾故顯官子弟多不振勢位之家多破殘上天之報昭然人苦不自覺耳

葉知遠知嵐谷縣壽限當終其春首知遠之子與一巨室同謀私受財物妄入人罪誣以劫掠其勢炎炎罪及千家知遠覺其情并其子申於朝力爲明辨遂免千家之罪城隍申奏知遠延壽一紀一年內妻妾生二子皆榮顯然則善簿所記存心如知遠者有何人知遠若私其子以害民必自受責其禍當何如今遣童子三百萬巡察四方官吏善惡各行果報

天下通行道釋章第六

真君曰僧道出家名爲離塵垢今世可駭纔入道場逆料施利之多少加減法事或醉酒飽肉或畜妻私寮穢德彰聞有負

上聖救世之心如此等類歷劫不救

通州海門縣景覺之有子名福孫九歲出家名祖惠二十八爲長老濫稱禪師而不明本性罪惡又多其伯景識之有女名蓮真年十八出適與其夫失歡而回故家僧祖惠出入

伯氏時或過宿與蓮真通淫其伯以一家無
間初不知覺僅及兩月司命大怒徑奏上蒼
適遇雷公奏事奉命碎祖惠尸首於通衢拷
其魂於酆都地獄萬劫受罪不捨晝夜又以
雷火三遶蓮真三焚之不令死大書其背曰
亂倫恠獸求生不得求死不得如是三年方
令入地獄受罪配入禽獸道識之夫妻以閨
門不肅各減壽一紀惡疾而終蓮真之姑中
間知覺私受二百貫大風剗其目截其鼻日
夕自稱曰我黨同亂倫恠獸使我至此伽藍
土地以失申奏亦拘繫獄府日受鞭笞責以
重罰黑氣二十四道其中一道是僧道淫穢
褻瀆

上真事一道是世人殺所生男女冤氣衝天其
他皆罪惡所積今通都大邑有敗禮之家或
至親或宗黨既出家者往來私家男女雜遯
無間不知僧道壞俗俗壞僧道亂上天人倫
背至真教法天地震怒罪人惡籍侮戲三教

如此等罪何時可懺邪今遣飛天大聖統御
鬼魔四十萬以雷公主之巡行四方日夕申
奏如有亂教法者仰雷公便宜施行夫道與
佛初無負人而人自負之壬申歲世人以誦
經修行證道果佛果者七千人蓋自清心寡
慾先修人事不犯人倫科戒積德累功諸惡
不作然後得此今勸世人若能遵此六章行
之乃可免禍而得福背吾所言天條不赦
真君曰混沌未分吾統天地人之道自太極判

吾與大道俱顯吾上則贊天行化下則濟度
萬民故證斯果吾統天地人何神不攝何事
不該何物不佑何罪不罰何祈不應何劫不
定吾哀世人造惡不已或心生或口語或教
人或自作畫則不足夜以繼日今大劫可駭
不生悔心不覺不知流浪苦海生而害身滅
家死後萬劫受罪作禽獸身昏昏默默永無
出期深可悲哉每家各宜書寫此經一帙日
夕瞻視依此六章修行然後誦

玉帝聖號及感應經行之二年萬罪消滅行之
四年百福皆集行之七年子孫賢明榮登科
第行之十年壽命延長行之十五年萬事如
意行之二十年子孫爲卿相行之三十年注
名仙籍行之五十年天神恭敬名列仙班不
依此六章加意修行或作或輟今日行明日
廢人事旣乖心田日暗雖口誦經而其心不
悟是爲瀆

天罪不容赦咄哉一違吾言斷不容恕

太上元始天尊說梓潼帝君應驗經

爾時

元始天尊在鬱明天宮玉京山內結成五色綵
雲之蓋領諸天仙衆日月星辰輝煌晃耀山川
鬼神拱手贊嘆咸曰吾等生居混濁塵凡之世
希遇

天慈廣爲開悟

梓潼帝君雍容進步再拜

帝前長跪而言弟子從劫劫中萬失本身責在

蜀地念下凡受諸雜劫或生禽獸之中或處蠻
戎之內富貴有別貧賤有殊受水火刀兵之災
罹輪迴生死之苦不有天地日月星辰毀謗教
門不敬三寶師資父母致令生雖快樂不免墮
五途三趣劫劫輪迴不知覺悟見此等人民受
報非一今遇

天尊下臨卽現毫光輝耀萬里諸天仙衆暨諸
天上地下水瀆獄司神祇各居五色琉璃之內
以聽宣說

元始天尊曰奇哉帝子憫念衆生說是因緣心
爲開悟陰陽還迭日月推移星辰流伏地土崩
裂皆屬上天變遷凡民受天地中生稟陰陽氣
五行成就二炁結成不知人身難得中土難生
嫉妬貪淫未知懺悔致使兵戈疫癘水火災殃
悉皆繇也臣從前稽首告

天尊曰民受災禍竟莫憫聞何以解謝
天尊凭几而言汝居

昊天之位齊太乙之尊名高南極德被四方掌

混元之輪迴司仕流之桂祿六籍竝考五嶽具
聞念此凡民當爲救濟

天尊卽說贊曰

於是元始尊 定居琉璃內 憫念衆生惡
三塗及五趣 茫茫不知覺 當同日月晦
不知稟五行 星辰爲遷運 時有梓潼君
從座宣慈愛 分身行變化 筆中顯三昧
解禳並開門 玉京幾宣對 下觀世間人
受苦無耆艾 不覺不知悟 今爲汝懺悔

衆生聽指迷 五嶽無罣礙 輪迴司救苦
地獄無馳背 福禍並通傳 吉凶先與暨
好生奉大道 慈悲爲除害 永開仙教門
依教永無辜

又贊曰

桂祿籍汝司 文章爲汝全 若要登仕路
賴汝爲權衡 善惡是禍福 通達在因緣
把筆爲直書 榮枯豈偶然 有福必有報
無善亦無偏 諸天稱曰善 何繇得昇遷

於是

元始天尊說是經畢謂

梓潼帝君曰汝居西蜀之中鳳凰山上顯靈凡
土俱有象成察九億十萬劫之變化掌救苦之
一職司禍福於四方聆吾片辭以禪寸善尚加
謹畏以答慈悲

梓潼帝君卽爲跪謝重白

天尊願將行與世世讀誦以釋災禍

天尊曰善哉善哉誦之則百福來臻子孫榮慶

終身顯達謗之殃及九祖禍延汝身於是

天仙等衆卽說偈曰

寂寂玄玄爲大道 昏昏杳杳是凡愚

今朝得觀天尊教 凡愚從此免嗔癡

頌畢諸天仙衆

梓潼帝君再拜

天顏作禮而退信受奉行

奉道經生 誦經已畢 洗心長跪 依光懺悔

七曲慈尊真教主 慈父慈母同我生子生聖子

皆孝慈孫繼神孫盡慈孝一家和氣天無盡萬
世春臺月有光慈光普照諸天人細入微塵滿
天地我生同得乾坤體一似文昌始劫時聖共
自聖凡自凡流浪至今方覺悟願尊七曲慈尊
教惟忠惟孝惟慈心不以口業傲神人不以身
業累父母不以意業欺天地不以心業禍子孫
願從行孝與陰功種種力行諸方便懺悔多消
諸罪垢皈依七曲大慈光求嗣求祿求生方不
求諸人求諸已惟我七曲文昌師歷劫待人存

恕法願放一種如意光憫念衆生真懺悔

懺悔已周次當發願

父母願同長壽果龜齡鶴髮映慈光已身願拜
大吉祥仰事俯育無苦惱子孫願嗅雲崑桂嘉
與子孫同發榮父慈子孝一家春光明無負慈
尊教願蒙七曲親接提指引登真選佛門捨生
受生正偏知盡未來時俱圓滿

發願已周次當贊頌

桂香殿上慈悲教主海月流洗業根業根化作

桂花香善本種成長壽果一家骨肉無煩惱七
曲子孫同護持普願今世與來生紫雲巖前長
得道步步心心帝左右生生世世天主張骨凡
可換形可灰一點貞心自金石

禮訖隨意啓禱安謝焚錢回向

化錢呪

物稟一炁神化無方以呪化財燦爛祥光神
仙洞府永降吉祥

回向呪

回別五雲輿騰駕九長空

余爲諸生時應壬子鄉試點名畢天尚未明因囑本號軍人曰汝勿多言余少息以便題下好作文字也軍人亦唯唯第覺似睡未睡間有二童子執金瓜引一官綠袍金帶而入至余席舍出袖中一小卷示余接而展閱之上列第幾名字樣而姓名則如夔龍狀不能解卷而還之彼欣然受而復置袖中與余相向爲禮而別並無一言亦未入別舍余醒而始知其爲夢因遍訪同號諸友姓名而記之出而爲同寓者告皆以

爲異後放榜余果僥倖查同號諸友四十餘人
未有一中者其爲文昌無疑故表而出之以爲
文昌之一驗